

Privremeno izdanje

Politička situacija na Balkanu

Rezolucija 1839. (2011)¹

1. Parlamentarna skupština konstatuje da, uprkos globalno pozitivnoj ocjeni situacije na Balkanu, nedavno povećanje napetosti i politički ćorsokak u nekim dijelovima regije izazivaju zabrinutost. Skupštinu posebno brinu:

1.1. Žestoki sukobi na sjeveru Kosova² na administrativnim prelazima sa Srbijom, u kojima je ljetos poginula jedna osoba, nastavak tenzija i erupcija nasilja koji traju još i danas čime se blokira svaki napredak u pregovorima između Prištine i Beograda, uz posredništvo Evropske unije;

1.2. Politički zastoj u Bosni i Hercegovini koja, godinu dana nakon općih izbora iz 2010. godine, još uvijek nema vladu na državnom nivou, što predstavlja najtežu političku krizu od kraja rata 1995. godine.

2. Što se tiče rastućih napetosti i nasilja na sjeveru Kosova, Skupština:

2.1. duboko žali zbog nedavnog nasilja nad osobljem mirovnih snaga na Kosovu (KFOR) kojim komanduje NATO;

2.2. traži hitno otvaranje objektivne istrage o incidentu koji se desio na administrativnom prelazu Jarinje, 27. septembra 2011. godine, u kojem je šest osoba ranjeno;

2.3. poziva stanovnike sa sjevera Kosova da ostanu suzdržani i da u konstruktivnom duhu i bez odlaganja sarađuju sa KFOR-om i sa Misijom vladavine prava Evropske unije na Kosovu (EULEX-om);

2.4. poziva vlasti u Prištini da pozitivno i pažljivo odgovore na legitimnu zabrinutost manjina u regiji;

2.5. poziva vlasti u Beogradu i Prištini da ponovno stupe u dijalog uz posredništvo Evropske unije o svim neriješenim pitanjima, u duhu saradnje i pomirenja, uključujući i situaciju na sjeveru Kosova, treba uraditi sve kako sjever Kosova ne bi ostao crna rupa na zapadnom Balkanu, izvan kontrole i prištinskih i beogradskih vlasti;

2.6. poziva zemlje članice Vijeća Evrope da potiču vlasti u Beogradu i Prištini da traže mirno rješenje za pitanje sjevera Kosova;

2.7. poziva svoj Komitet predsjednika da razmisli o slanju misije u regiju kako bi se intenzivirao dijalog i prevladale napetosti;

2.8. naglašava da prioritet regionalnih i međunarodnih aktera u regiji mora ostati sigurnost, stabilnost i poštovanje ljudskih prava, kako na Kosovu tako i u cijeloj regiji, kao i cjelovitost međunarodno priznatih granica u regiji, u striktnom skladu sa [Rezolucijom 1244](#). (1999) Vijeća sigurnosti Ujedinjenih naroda.

3. Što se tiče političkog zastoja u Bosni i Hercegovini, Skupština:

3.1. primjećuje da su zbog ovog zastoja, uglavnom oko prepirki vezanih za političke koncepte oko raspodjele deset ministarskih mjesta u Vijeću ministara, nastale ozbiljne posljedice: međunarodne finansijske agencije su smanjile kreditnu ocjenu države; direktna strana ulaganja su opala za 75% od 2009. godine; nezaposlenost pogađa više od 43% aktivnog stanovništva; država funkcioniše na privremenom budžetu budući da državni budžet još uvijek nije usvojen;

3.2. žali što odlazeće Vijeće ministara nije bilo u stanju da pokrene reforme neophodne da se Bosna i Hercegovina pripremi za pristupanje Evropskoj uniji, tako da Sporazum o stabilizaciji i pridruživanju, koji su od oktobra 2010. godine ratifikovale sve zemlje Evropske unije, još uvijek nije stupio na snagu;

3.3. apeluje na sve vođe političkih stranaka da bez odlaganja pronađu rješenje za politički zastoj, što bi državi dalo perspektivu za evropske integracije i za pojačanu regionalnu saradnju;

3.4. još jednom poziva vlasti da bez odlaganja izvrše presudu u slučaju *Sejdić i Finci* Evropskog suda za ljudska prava, čime bi se manjinama i „ostalima“ koji ne pripadaju jednom od „tri konstitutivna naroda“ (Bošnjacima, Hrvatima ili Srbima) garantovalo pravo da se na izborima kandiduju za članove Predsjedništva Bosne i Hercegovine;

3.5. apeluje na sve zemlje članice Vijeća Evrope da vlastima Bosne i Hercegovine ponude pomoć kako bi one izašle iz političkog ćorsokaka i iz pogoršane ekonomske situacije te ispunile svoje obaveze i angažmane prema ovoj organizaciji.

4. Što se tiče situacije u Albaniji, Skupština:

4.1. pozdravlja činjenicu da su općinski izbori u 2011. godini sada i službeno završeni i da su njihove rezultate prihvatili albanski birači;

4.2. primjećuje angažman vođe Socijalističke partije u okončavanju bojkota parlamenta od njegove stranke;

4.3. ohrabruje sve stranke da bez odlaganja djeluju na jačanju svog demokratskog unutrašnjeg funkcioniranja i na normaliziranju političke situacije te da u parlamentu počnu politički dijalog o prioritetima i neophodnim reformama koje treba provesti s ciljem počinjanja pregovora za pristupanje Evropskoj uniji;

4.4. pozdravlja nedavni dogovor koji su postigle Demokratska partija i Socijalistička partija čiji je cilj napredak u izbornoj reformi i poziva ih da osiguraju da se tom reformom otklone nedostaci otkriveni tokom općih i općinskih izbora i da se njom da više mogućnosti malim strankama da uđu u parlament, kako bi se time okončala politička bipolarizacija koja je označila politički život u Albaniji i kojom posljednjih nekoliko decenija albanski narod nije bio zadovoljan. Tokom procesa izborne reforme trebalo bi tražiti mišljenje Evropske komisije za demokratiju kroz pravo (Venecijanska komisija).

5. Skupština odlučuje da pomno prati situaciju na zapadnom Balkanu, naročito na Kosovu, u Bosni i Hercegovini i u Albaniji.

¹ *Skupštinska rasprava od 6. oktobra 2011. godine (35. sjednica) (vidjeti [Dok. 12747](#), izvještaj Komiteta za politička pitanja, izvjestilac: gosp. von Sydow). Tekst usvojen na skupštinskom zasjedanju od 6. oktobra 2011. godine (35. sjednica).*

² Svako navođenje Kosova u ovom dokumentu, bilo da se radi o njegovoj teritoriji, institucijama ili stanovništvu, treba shvatiti u punom skladu sa Rezolucijom 1244. Vijeća sigurnosti Ujedinjenih naroda i bez prejudiciranja statusa Kosova.